

एकला दरा तम्हें नामे ती कुडुख खल्लन हों होअनय कानय  
 धोखअय तो धयो, अन्नेर तम्हें तंगदा वगायन नेखय गने जूडी  
 पाँति ननोर अरा एका आल खोडहा नू रओर !

धयो - होन्ने वअदी खने एङ्गा लग्गी धयो, का नाम तंगआ खदु  
 खरन विहनी लेक्खा जोगावओत । विहनीन चाँखआगे एकासे  
 खल्लन सारे चिअर उईय्यनय-खोंसनय अन्नेम खदुयन लू  
 चिअर दव डहरे नू एकतओत । आरिन तंगआ एख नुम  
 पोसओत-परदओत अरा तंगआ मभही नूम जूडी-पाँति ननोर  
 तंगआ ओत्थान आरिनिम चेडतओत - कुम्मतओत होले आ  
 एडपन का राजीन सम्भडआ ओंगोर ।

फुलो तङ्गियो - खदुन-खरन दव लूर चिअनन वअदी खने एंग  
 खन्नती खज्जलखों खतरई । सन्नी नू एन एकासे रहचअ  
 अरा अक्कु अयंग-बङ्गही बेलुरिया ती ई उज्जनन खक्खअन  
 एंगहै गा जे मंज्जा से मंज्जा मुंदा खदु-खरन एन्देर नापे ती दव  
 लूरन चिअोन का आर उन्दुल एंगगन ओक्तओर दरा ओतओर ।

डंडडी - सन्नी नू रहचन धिया आयो कोरा धिया वावा कोरा  
 अक्कुगा धियागो (भाँक लउवा मंज्जअन)  
 भाँकन चडअर हेबेडनय, लौवान् चोखअर हेबेडनय ।

(एंडो आलीर चींखनर)

फुलो तङ्गियो - हाय धयो, अक्कुन गा नीन रअदी दरा एंगहै  
 खज्जलखों गने निंगहै खज्जलखोंन टिडआ लगदी । एन्ने  
 वारिम दव संगो रआ खने जिया नू जिया खक्खरई । ई आली  
 आ आलीन पडगो, आद इदिन होले तेंगाय तो ई खेखेल राजी  
 नू आलीर गहि दुःखेनू ने खतीर चिओ क्का जोलजा ननो ।  
 मुक्कय ही जोलजा मुक्कयइम जुनु । मेतय गा जोलजा मल  
 चिओर । हय, फुलो तम्बस इकला जुनु ई एडपन वुभुरओस ।  
 आस गा एंगहय जियन नुंजतआगे एकला ओंगदस । सोटा-  
 वल्लु ती कछनखरआगे, बई ती केवागे ।



धयो - जिया निगहैन हूरु खोदोखआय, एंड अंगंटा खद-खरन एराय ।  
 आ एंडों वापे बेटार गा निमन इकला दुरु ननोर अरा ओन्तओर  
 का धयो जियन खतीर ननय दरा रअय । एकअम उल्ला  
 निगहै खद-खरंगे ओन कवर हों मल खखरओ होले एंगन तंगके ।  
 एगहै बन्टन जूनू उइकी रओन ।

फुलो तङ्गियो - ओंगहोन-ओंगहोन वरके जूनू धयो । ई खेखेल नू  
 ने जुनू एंगगा रअनय का । कोरके उरुखके, नीन एकला गा  
 एगहै दुःखन अखदी ।

(धयो चइल काली)

फुलो तङ्गियो - ए जिया, अक्कुगा नीन अयंग तलदी । ओन्द  
 उल्ला नीनिम अयंग गहि कोख नू पूप लेखआ रहचकी ।  
 अउला निग्गा ई दुःखे गहि फहमदिम मल रहचा । धर्म, नीन  
 आ सोना लेखवा बोलो परियन एखो से रआ चिअदय । हय,  
 आलय गहि उज्जना, एंवदा चाँडे नन्ना मनी काली । आलीर  
 गहि उज्जना गा कोढहे नन्ना मनी । आर गहि जिया, अयंग  
 गहि जिया मनी काली ।

जिया, नीन उन्दुल उरुव अयंग-वङ्ग गहि खद रहचकी इन्ना  
 नीन कीड़ा एडपा गहि अयंग मन्जकी । उन्दुल नीन तूर  
 कुड़िया काला लक्की । इन्ना, निग्दा वगय वनी कानय ।  
 अक्कु तरकी रअय जिया - जे उंगदी से ननय । विदा चिच्चर  
 अउला तिङ्गियो-निम्वा निगहै विडदो रहचर, इन्ना निगहय आलस  
 निगहै विडदो । उन्दुल ओन टिप्पा खन्जलखोन चीचुर खोपोर-  
 का रहचर । मुंदा हाय, इन्ना निगहै खन्जालखो खाड़ बेसे वाहओ  
 अन्नु हों चीचुर ने हों मला । उन्दुल कीड़ा मल रअनू हों ढेर  
 खल्लुर रहचर पहें इन्ना अन्न बेगर नीन गा नीन, निगहय वछरु  
 गुंठ्ठी गे एन्दरन चिओय । निगहय लेखआ नन्नर गे एन्ने अम्बन  
 मनन । निगहै बेसे रःउर गे मनन नेकअन ।  
 अयंग जिया गे एकन्ने खिलपत रःई अन्नेम सुखे हों वरई ।  
 एका तरा केरकर खदारो - फुलो, पुनई !

फुलो - अयो - (बोंगने बरई दरा खेंवचरई)

फुलो तङ्गियो - हूह ... एंगहै खन्न निमन एरर उडचा अरा जिया  
कीरचा। एंगहय उर्मी रोगे गहि नीमिम मन्दर हिकादर  
मेनातो ! एन उन्दुलआकेम मल रओन होले ?

पुनई - अयो एम चींखोम, एडपा नू, खूडी नू, चाली नू, वटगी  
उर्मी गुसन निग्गन वेदोम। अयो नीन एमन अम्बोय द  
कालोय होले कीडा मल लगो अम्म ओनका मला, एम खन्दर  
हों पोल्लोम अरा उरखा-उरखा डहरे नू निग्गन एरोम।

फुलो तङ्गियो - सथोम एन्नेम नीम जोक्क गहडी गे मल रअद  
खने एंगहै जिया अकवकरई काली। अंगोम नीम एंडो खद  
तनअम इवडतिम बेचा। एन निमन ईरकिम विओन द  
खुशमरओन।

फुलो - अनयो ! अन्ति एम्बस एन्देरगे निगहै बेसे मल वअदस ?  
एमन एरर किम हउकारदस।

पुनई - पेठ ती वरदस खने मिठई चिआ वा वअदस खने गा खेखट  
आदस चिअदस।

फुलो तङ्गियो - हई सोना खदारो, अक्कुन नीम निम्बासिन बुभु  
रआ पोल्लोर। बुभुरआगे निमा अन्ने सवंग हों मल्ला।  
आस निम्है बंगस, मुंदा एंगहै बेसे आस गहि जिया एकसन !  
आस गहि जिया नू निमागे चोन्हा दिम एकसन ! आस  
निमन इकला ओन कंवर तिन्दओस। इकला तंगहै ओन्ना  
जुट्टन निमा अम्बोस ! से रअस निम्बस। अक्कुन नीम  
पोल्लोर बुभुरआ गे पहे परदोर होले उर्मीन अखओर।

फुलो - अनयो ! अन्ती एन्देरगे निगन खनेम-खनेम पसदस ?

पुनई - एंगहै चींखा-चींखा वअनन हों मला मेन्दस।

फुलो तङ्गियो - आस निम्है उज्जनन् बुडावआ लगदस।  
तंगहय अरखी ओन्नन वरजएन, निमन लूर कुडिया तङ्ग्यागे  
वःएन, नलख मला नन्दय वःएन अंगो एंगन पसदस।



पुनई - अक्कु अमके वरजआ अन्ति यी !

फुलो तङ्गियो - एंग्हे वछरु, नीम बुभुरआ पोल्लोर । एन निम्बा-  
सिन एंग्हे जिया कालो अन्नु हों वरजओन । आलय नन्नर गहि  
आलोन खडनय वच्चनय, निम्बस निम्है उज्जनन् खडआ-वच्चा  
लगदस । नाख आना खल्ल नू आध आना खल्ल, ओहरे -  
निमन ताका एकला ओन्तओस मन्डी मला, अदिगेम खोवरा-  
रःएन ।

(अयंग लूर कुडिया तइयागे सजू-बजू ननी) (तम्बा ढक्करेस  
कोरदंस)

ढक्कर - खट्टारिन लूर कुडिया तइयोन वअदी, एरके निम्बस  
पद्दा लूर कुडिया नू लूर चिऊ रहचस, अवंगेम निंगन एन्ने लूर  
चिच्चस ! एन हों महतो खट्ट हिकदन । बेलुरा, महतो खट्टर  
मल कालोर लूर कुडिया । बेन्जेरका माखा ता कत्थन मोधो-  
रकी ? अउलम एन वाचकन - कुक्कोर मनोर आर एंग्हे  
डहरे नू अरा कुके मनोर आर निंग्हे डहरे नू एकोर । पहें लूर  
कुडिया एकासे कालोर ! आर ननोर तव ओनोर ! पुन-  
ईस गोहला उइयोस फुलो, निंग संगे वनी कालो । लेडगस  
फिता-खोंगसो विसागे पेठ कादस, एन महतो आलन पेठ उल्ला...

अयंग - निंगन गोहरारदन फुलो तम्बायो, अन्ती खट्टारिम ए  
कोहा रअनय दरा गोहला उया का पेसगेआ कालोर ?

ढक्कर - सत्री कोहान रआ चिई, दुदहिन गा अम्बियर मला !  
अक्कु एन्देर पुनईस लकटा खुटान मल धरओस । दरा फुलो  
वनी-लस्सा मल कालो होले, थरा-डुवहा नू एन्दरन लूर धर-  
ओर । लूर गा अन्नुम रःई ।

अयंग - नीदी ललहेर खट्टारिम नलख ननोर अरा अदिन नाम  
ओनोत होले नम्है उज्जना गहि एन्देर मोल । नम्है सवङ्ग रःई,  
नामिम नलख ननोत अरा आरिन लूर कुडिया तइयोत होले  
एन्देर मनो पहें ?

ढक्कर - बेकर गहि खद् हिकदी अनू बलदी । सत्री <sup>एकन</sup>  
 बेक ठेक्कन निन्दआगे गा दोकड़ा-कचा मल्ला ! तो <sup>ईरिन</sup>  
 लूर कुड़िया तइयोय । ईरंगे वनी काना गोहला उइना ती  
 वगगे दव एका लूर रःई । इवड़ा नू खर्चा हों मल्ला । <sup>अखदी</sup>  
 का बदली - का ओन चटगा केम चाड़ रःई !

अयंग - हई फुलो त्म्वायो, खद्दर गहि दव नलख गे एंगगा ओन  
 एंड चटगा हों एम्बम लगगे । एन बेकर ही खद् मनर अखदन  
 जुनू का बेक खेन्दना मोखना एवदा ओत्था रःई । पहें नीन  
 टोप्पर गहि खद् मनर अखदय का मदगी रासी खेन्दागे इवन्दा  
 सेव्वा मल्ला ।

ढक्कर - एरके, एंगती वगगे कथा कमचकी होले निगहै उज्जना,  
 नाख जनर गहि खेसेर मइय्या अरगो । ढक्करसीन सिखा-  
 वअदी (पसदस) खदारिन लूर कुड़िया तइना गहि कथन अउर  
 ओथोरकी होले अखके अउलम निम्बस गहि बेज्जन एरोय ।  
 (पुनईसती) ए - लूर कुड़िया कालू ठेज्जगर, लूर कुड़िया केरकय  
 होले एरके अइरतओन । पइरीम नाडी उसागिन मल सुरताच-  
 कय होले कुचओन । अरा नीन सोतोड़एङ्ग, लूर कुड़िया  
 किरकी होले चुट्टीन नतगोन चिओन से हिकदन ढक्कर । ई  
 एइपा ता एन्ने ओत्था का मलदव धतंक का मिटकु अरा रोवहा  
 गरहि भगड़ा गुट्टि गहि इन्नम ओक्कना रःई । ढक्करेस  
 मल कालोस होलेगा कथादिम मल वनओ अरा आस-केरस  
 होलेगा अधहा - एंड पेंटी गे ओथोरओसिम । पेठ केरस होले  
 ढक्करेस ओइका ती उजओस पदा नू गा भला महतोसिम;  
 अउइका वोरान अत्तरा उइय्या, वरओन की पेठ कालोन, लेइगस  
 हों ठौकम आ गे वरओस । (कादस बहरी)

अयंग - (चींखी एंड खद्दर बरनर अरा खेवंचरनर) ओ, सोना  
 एंगदा वगारो निम्है भइग नू सत्री तिम अर्जआना दरा ओत्था  
 रःई । अयंग-वंग रहचका नुम एन्देर मनो ।



पुनई - आयो अदिगे नीन अम्बय भखअय एन गोहला उयोन यो ।  
लूर कुड़िया पोल्लोन काला ता नीन इसानिम तनि-तनि लूर  
चिआय !

फुलो - अनयो ! एन ओन बीड़ी वनी लस्सा दरा ओन बीड़ी  
लूर कुड़िया कालोन अन्नु हों एम्बस केवोस का यो ?

अयंग - विटी, ओह रे सोना वनओ जुनु पहुँ निम्बस अदिन एरा  
सहओस ? आसगा बेदस नीम लूरगरिया अम्बोर मना ।  
गदहा का गदहा राइह कालोर, ओह फुलो तम्वायो ! विटी  
सोना एगहै, एराय एड़पन एरयि विटी, एन छिप्पन नोड़न ।  
एरा बेटा पुनई नीन नाड़ी उसागिन एरा खोजा ।

फुलो - पुनई ददा, एदे - एरातो (फितान ओथोरई दरा) एदे  
ददा (पुनईस बोंग बरदस) जोक्क खंडा एंगगा हों ने ?

अयंग - रआ चिए मई, निंग ददास गहि कयरहन वलदय का !

पुनई - एन्देर हों मल ननोम यो एरालगदम जुनु ।

(तङ्गियो उरखा बिहीकिम लेड़गस कोरंदस अज्जो-इज्जो  
एरदस दरा तंगियोती)

मल ईरदी, मल बरजआदी निगंदा वगारिन । पेठ होअना  
आलोन बेचा लगनर । (बोंग उछलारने आरिन कप्पदस)  
अक्कुन ऐंठआदन बेरखारो, कमई नन्जका रअदर दरा फिता  
अत्तोर (खेसरन चिपदस)

अयंग - हाँ हाँ, लेड़गा ! आर गहि सवंगदिम ए कोड़हे रःई  
दरा नीन आरीन एन्ने खेर लेक्खा मोमरआ लगदय ।

(आरिन आस गहि खेक्खाती बच्ची)

लेड़गा - रआ चिई, अम्बय, मलता एरके - बड़ा ईर एगहै उइका  
उसराचकन तुमुड़-तुमुड़ ओथोरओर मंखोर ।

अयंग - (आरिन मल अम्बी) ए, लेड़गा बेटा, रआ चिआ जे  
मन्जा से मन्जा । एंगन कोड़ा बेटा एंगान, निंगड़ी वगारिन  
रआ चिआ, नीदी गा ललहेर रअनर ।



लेड़गा - मला विछिरओय ?

अयंग - मला मल विछिरओन ! हारे वेटा ईरिन पिटोय चिओय ।

लेड़गा - एन्ने वारिम एम्है जिया खिसारई (बोंग कादस अरा  
बल्लुन ओन्दोरदस) विछिरओय का मला ! तेंगाय ?

पुनई - अयो ! अम्बय चिई एमन, हूस निग्गन पिटा वेहस ।

फुलो - ददा, एम्है वलना गे एमन पसआ । अयोन अम्वा अयोन  
अम्वा ददा ! ...

(लेड़गस एंडोर ही खेस्सरन चिपदस)

अयंग - हय मई, ओन्टे फिता - ओहरे फिता, ओहरे लेड़गा,  
ओन्टे फिता करने निग्डी बगारिन एन्ने । एन्देर आर फिता  
लेख्वा हों मलिकर !

लेड़गा - और फितान बेचोर ! विच्चकर होले एरके !

(बल्लुन एदअर) एम्बस इकिया केरस यो -

अयंग - एन्देर अखओय -

लेड़गा - एन्देर अखओय, नीन अखओय, तेंगाय मलता एरके !

अयंग - हुत्तरम जुनु को ! एसन पंच्च उक्का रअनर का एन्देर  
दे ! कटिको इसन रअदस दरा आसिन गा एसन भरा, असन  
वरा वअनय ।

लेड़गा - हाँ हाँ, एम्वासिन हूरु पड़गय । एन अक्कन केरकन,  
एम्बस एकसन रअस । हारे - एन तीरा दगदन, भराद बोथा  
मना टकओ ।

अयंग - (तंगदा बगारिन मीखी) खदारो निमागे एखो नसीव ।  
नीम एन्देर खोंगसो-फिता अत्तना जुकुर मलिकय । भुला  
अत्ता पुंदुरआगे ने निमा चिओ-निम्बस उल्ला-माँखा भरा-  
अरखी नुम रअदस । निंग ददस गा निम्है विड़दो रअस आस  
निमन एरा मल सहदस । (चींखी)

पुनई - अयो अम्बय चींखय । फिता विगर का भुला विगर का !



फुलो - अयो वनी-लस्सा कालोन होले खेन्दोय चिओय यो !

अयंग - ओह, एंगहै सोना गुट्टी ! निमां एकसन नसीव दरा  
निगिगयो-निम्वा निमागे चिओर । ओहरे चोन्हा मलका,  
एन्ने निगददस तंगडी वगर गहि खेंस्सरन चिपओस । ओहरे,  
अयंग दुलार ही मलका । खदस अयंग मइय्या वल्लुन मुर्ओस,  
ओहरे वपे-बेटा गहि दुलार मलका - तंगआ आलस तरती मइर-  
मुटगा अरा सत्ते-सिडहा केबेरना ओहरे एंगहै एडपा । इत्तुम  
दुःखे गहि नरक गड्डी, इत्तुम मेरखा गहि सुखे । हाय अयंग जिया  
निगहै - आलस अरा कोहा निगदस निगहै दुःखे ससाइत  
गहि गड्डी, आर गने नीन सहनुम कलय आर गहि गुनहन  
कुम्मनुम कलय । दरा इदा ई एड खदारिम निगहै मेरखा  
सुखे - ईरिन जिया उडना गूटि एराय, परदअय, सुमुरअय ।  
ईरिम उन्दुल निगहै एडपन मेच्छा चोदओर ।

(तङ्गियो चींखी, खदर बहरी एरनर)

(ममुस कोरदस)

पुनई - ममुस वरचस -

फुलो - ममुस यो ममुस यो -

(ममुस तंगहै पइलन ओन तरा उडदस । तङ्गियो चींखी)

ममु - एन्देर मन्जकी दरा मई, एंगहै कोरआ तपडेम

अयंग - (पाडी) हिविडिकय ददा हिविडिकय । २

खेता सोडा लेखआ हिविडिकय । २

ओलाली जिया ओलाली

धीरे धीरे जिया ओलाली

रासे रासे जिया ओलाली ।

हिविडिकय ददा हिविडिकय । २

बेगर मेना खोजम हिविडिकय । २

हिविडिकय ददा हिविडिकय । २

बेगर मया एंगगन हिविडिकय । २